

Азаматтарды медициналық сақтандыру туралы

Күшін жойған

Қазақстан Республикасы Президентінің 1995 жылғы 15 маусымдағы N 2329 Заң күші бар жарлығы. Күші жойылды - Қазақстан Республикасының 1998.12.17. N 324 Заңымен.

"Қазақстан Республикасының Президенті мен жергілікті әкімдерге уақытша қосымша өкілеттік беру туралы" 1993 жылғы 10 желтоқсандағы Қазақстан Республикасы Заңының Z933600_ 1-бабына сәйкес және Қазақстан Республикасында міндетті медициналық сақтандырудың, құқықтық, экономикалық және ұйымдық негіздерін бекіту мақсатында осы Жарлықты шығарамын:

I Тарау. Жалпы ережелер

1-бап. Медициналық сақтандыру ұғымы

Міндетті медициналық сақтандыру Қазақстан Республикасы азаматтарының денсаулығын сақтау жөніндегі олардың мүдделерін әлеуметтік қорғаудың нысаны болып табылады және ол Міндетті медициналық сақтандыру қоры қаражатының есебінен белгілі бір сақтандыру жағдайлары пайда болған кезде міндетті медициналық сақтандырудың базалық бағдарламасы шеңберінде медициналық көмек көрсету жөніндегі қатынастарды білдіреді.

Міндетті медициналық сақтандыру мемлекеттік әлеуметтік сақтандырудың құрамдас бөлігі ретінде Қазақстан Республикасының азаматтары үшін жалпыға бірдей болып табылады және оны Міндетті медициналық сақтандыру қоры жүзеге асырады.

Ерікті медициналық сақтандыру дегеніміз - сақтандырылған азаматтардың міндетті медициналық сақтандырудың базалық бағдарламасында белгіленгендерден тыс қосымша медициналық қызметтерді алуын қамтамасыз ету.

2-бап. Міндетті медициналық сақтандыру туралы заңдар

Медициналық сақтандыру туралы заңдар осы Жарлықтан, Қазақстан Республикасының заң актілерінен және соларға сәйкес қабылданған Қазақстан Республикасы Президенті мен Үкіметінің актілерінен тұрады.

Егер Қазақстан Республикасы қатысушысы болып табылатын халықаралық шартта міндетті медициналық сақтандыру туралы Қазақстан Республикасының заңдарындағыдан өзгеше ережелер белгіленген болса, онда халықаралық шарттың ережелері қолданылады.

3-бап. Осы Жарлықпен реттелетін қатынастар

Осы жарлықпен:

міндетті медициналық сақтандыру шартын жасау және оны орындау процесінде туындайтын Міндетті медициналық сақтандыру қоры мен сақтандырушының арасындағы қатынастар;

медициналық қызмет көрсету туралы міндетті медициналық сақтандыру шартын жасау және оны орындау процесінде туындайтын Міндетті медициналық сақтандыру қоры мен медицина ұйымының немесе жеке медициналық практикамен айналысатын адамның арасындағы қатынастар реттеледі.

Ерікті медициналық сақтандыру жөніндегі қатынастар сақтандыру туралы заңдармен реттеледі.

Әскери қызметте, ішкі істер, ұлттық қауіпсіздік органдарында, республикалық ұланда, кеден органдарында, салық полициясында қызметте жүрген азаматтарға міндетті медициналық сақтандыру жөніндегі қатынастар қолданылмайды.

4-бап. Қазақстан Республикасының аумағында тұрақты тұратын, сондай-ақ уақытша жүрген шетелдік азаматтар мен азаматтығы жоқ адамдары Міндетті медициналық сақтандыру

Қазақстан Республикасының аумағында тұрақты тұратын, сондай-ақ уақытша жүрген шетелдік азаматтар мен азаматтығы жоқ адамдарды міндетті медициналық сақтандыру Қазақстан Республикасының Үкіметі белгілеген тәртіппен жүзеге асырылады.

5-бап. Міндетті медициналық сақтандыру жөніндегі қатынастардың қатысушылары

Міндетті медициналық сақтандыру қоры, сақтандырушылар, сақтандырылушылар, сондай-ақ медицина ұйымдары мен жеке медициналық практикамен айналысатын адамдар міндетті медициналық сақтандыру жөніндегі қатынастың қатысушылары болып табылады.

Міндетті медициналық сақтандыру қоры (бұдан әрі - Қор) - заңмен белгіленген тәртіпте заңды тұлға ретінде тіркелген, ақша қорларын қалыптастыруға арналған оның есебінен міндетті медициналық сақтандырудың базалық бағдарламасының шеңберінде азаматтардың кепілді медициналық көмек алуы қамтамасыз етілетін мемлекеттік коммерциялық емес ұйым.

Сақтандырушы - Қормен міндетті медициналық сақтандыру шартын жасаған және сақтандыру төлемдерін төлейтін тұлға.

Жұмыс істемейтін тұрғындар (кәмелетке толмағандар; мемлекеттік оқу орындарының күндізгі нысанында оқитын адамдар; зейнеткерлер; жұмыс істемеген кездегі кезеңі еңбек стажына есептелінетін адамдар; белгіленген тәртіппен тіркелген жұмыссыздар) үшін - тиісті жергілікті атқару органдары;

жұмыс істейтін тұрғындар үшін - жұмыс беруші сақтандырушылар болып табылады.

Халықтың басқа санаттары міндетті медициналық сақтандыру шарттарын дербес жасасады.

Сақтандырушылар - оларға қатысты міндетті медициналық сақтандыру жүзеге асырылатын адамдар.

Емдеу-профилактикалық ұйымдар, ғылыми-зерттеу және медицина институттарының емханалары мен басқа да медициналық ұйымдар, сондай-ақ заңмен белгіленген тәртіпте тіркеліп және лицензия алып, медициналық қызметпен айналысушы адамдар міндетті медициналық сақтандыру жүйесіндегі медициналық ұйымдар мен жеке медициналық практикамен айналысушы адамдар болып табылады.

6-бап. Міндетті медициналық сақтандырудың базалық бағдарламасы

Міндетті медициналық сақтандырудың базалық бағдарламасы - сақтандыру жағдайларының тізбесі (аурулар мен жарақаттанулар), мұндай жағдайлар болған кезде Қор медицина ұйымына немесе жеке медициналық практикамен айналысушы адамға немесе Қормен міндетті

медициналық сақтандыру шартын жасамаған медицина ұйымына өтініш білдіргендерге немесе жеке медициналық практикамен айналысушы адамдарға медициналық қызмет көрсету жөніндегі шығындарға өтем

жасайды.

Міндетті медициналық сақтандырудың базалық бағдарламасын Денсаулық сақтау министрлігі әзірлеп, оны Қазақстан Республикасының Үкіметі бекітеді.

II Тарау. Міндетті медициналық сақтандыру жүйесіндегі шаралар

7-бап. Міндетті медициналық сақтандыру шарты

Міндетті медициналық сақтандыру шарты дегеніміз - бұл Қор мен сақтандырушының арасындағы жазбаша келісім, ол бойынша сақтандырушы Қорға сақтандыру төлемдерін төлеуге міндеттенеді, ал Қор сақтандыру жағдайы болған кезде сақтандырылған адамға міндетті медициналық сақтандырудың базалық бағдарламасының шеңберінде медициналық көмек көрсеткен медициналық ұйымның немесе жеке медициналық практикамен айналысушы адам шығындарының орнын толтыруға міндеттенеді.

Қор мен сақтандырушының арасындағы міндетті медициналық сақтандыру шартында:

Қордың атауы, оның орналасқан жері және банктік реквизиттері;

сақтандырушының атауы, орналасқан жері және банктік реквизиттері (егер ол заңды тұлға болса), сақтандырушының фамилиясы, аты-жөні және мекен-жайы (егер ол жеке тұлға болса); сақтандырушылардың саны туралы мәліметтер;

сақтандыру төлемінің мөлшері, оны төлеудің тәртібі мен мерзімі болуы тиіс.

Тараптардың келісімі бойынша шартқа өзге де жағдайлар енгізілуі мүмкін.

Егер міндетті медициналық сақтандырудың шартында заңдарда көзделмегендер салыстыра қарағанда сақтандырушының жағдайын нашарлататын жағдайлар бар болса, онда заңдармен белгіленген ережелер қолданылады.

Шарттың нысанын Қазақстан Республикасының Үкіметі айқындайды.

8-бап. Медициналық қызмет көрсету туралы шарт

Медициналық қызмет көрсету туралы шарт дегеніміз - бұл Қор мен медицина ұйымының немесе жеке медициналық практикамен айналысушы адамның арасындағы жазбаша келісім, ол бойынша Қор сақтандырылған адамға міндетті медициналық сақтандырудың базалық бағдарламасының шеңберінде медициналық қызмет көрсеткен медицина ұйымының немесе жеке медициналық практикамен айналысушы адам шығындарының орнын толтыруға міндеттеледі, ал медициналық ұйым немесе жеке медициналық практикамен айналысушы адам

сақтандырылған адамға міндетті медициналық сақтандырудың базалық бағдарламасынан кем емес ауқымда медициналық қызмет көрсетуге міндеттенеді

Медициналық қызмет көрсету туралы шартта:

Қордың атауы, оның мекен-жайы және банктік реквизиттері;

медицина ұйымының атауы, оның орналасқан жері және банктік реквизиттері, немесе жеке медициналық практикамен айналысушы адамның фамилиясы, аты-жөні және мекен-жайы;

тексеріліп-қаралған және (немесе емделген ауру адамға есепте көрсетілген медициналық қызметтер құнының мөлшері (медициналық қызметтің тарифтері);

медицина ұйымы немесе жеке медициналық практикамен айналысушы

адам шығындарының орнын толтыру мерзімдері болуы тиіс.

Шарттың нысанын, шығындардың орнын толтырудың тәртібі мен мерзімін Қазақстан Республикасының Үкіметі белгілейді.

Тараптардың келісімі бойынша шартқа өзге де қағидалар енгізілуі мүмкін.

9-бап. Міндетті медициналық сақтандыру жүйесіндегі шарттардың күші

Міндетті медициналық сақтандыру жүйесіндегі шарттар жасалған сәттен бастап күшіне еніп, тараптар үшін міндетті болады.

10-бап. Қордың міндеттері

Қор:

сақтандырушылармен міндетті медициналық сақтандыру шарттарын жасауға;

медицина ұйымдарымен және жеке медициналық практикамен айналысушы адамдармен медициналық қызметтер көрсету туралы шарттар жасауға;

шарттардың жағдайларына сәйкес медицина ұйымының немесе жеке медициналық практикамен айналысушы адамның сақтандырылушыға медициналық қызмет көрсету жөніндегі шығындарының орнын толтыруға;

сақтандырылған адам Қормен медициналық қызмет көрсету шартын жасамаған медицина ұйымының немесе жеке медициналық практикамен айналысушы адамның медициналық қызметін пайдаланған жағдайда, міндетті медициналық сақтандырудың базалық бағдарламасы шеңберінде оның шығындарының орнын толтыруға;

сақтандырылған азаматтарға медициналық сақтандыру құжатын беруге;

сақтандырушылардың сақтандыру төлемдерін уақтылы төлеуін бақылауға;
шартта белгіленген медициналық қызметтердің ауқымы мен сапасын бақылауға;
қолданылып жүрген заңдарға сәйкес медицина қызметкерінің теріс іс-әрекетімен сақтандырылушының денсаулығына келтірілген залалдың орнын толтыру үшін медицина ұйымына немесе жеке медициналық практикамен айналысушы адамға талап қоюға міндетті.

11-бап. Сақтандырушының құқықтары мен міндеттері

Сақтандырушы міндетті медициналық сақтандыру шарты жағдайларының орындалуына бақылау ісін жүзеге асыруға құқылы.
Сақтандырушы:

Қормен міндетті медициналық сақтандыру шартын жасауға;
Қазақстан Республикасының Үкіметі белгілеген мөлшерде, тәртіппен және мерзімде міндетті медициналық сақтандыру жөніндегі сақтандыру төлемдерін төлеуге міндетті.

Міндетті медициналық сақтандыру шартында сақтандырушының басқа да міндеттері көзделуі мүмкін.

12- бап. Медицина ұйымының немесе жеке медициналық практикамен айналысушы адамның міндеттері

Медицина ұйымы мен жеке медициналық практикамен айналысушы адам:

Қазақстан Республикасының Денсаулық сақтау министрлігі бекіткен медициналық-экономикалық стандарттарға сәйкес медициналық көмек көрсетуге ;

сақтандырылған азаматтардың өздерінің денсаулық жағдайларын асқындыруға апарып соғуы мүмкін медициналық нұсқамаларды бұзудың барлық жағдайлары туралы Қорды хабардар етіп отыруға міндетті.

13-бап. Сақтандыру төлемдері

Сақтандыру төлемдері - сақтандырушы Қорға салуға міндетті медициналық сақтандыруға төленетін жарналар.

Сақтандыру төлемдері міндетті медициналық сақтандырудың базалық бағдарламасының орындалуын қамтамасыз ететін мөлшерде белгіленеді.

Міндетті медициналық сақтандыруға төленетін сақтандыру төлемдері;

жұмыс істемейтін халық үшін - бір тұрғынға шаққандағы қаржыландыру шығындарының үлестік мөлшеріне сәйкес бюджет қаражатының есебінен;

жұмыс беруші үшін - еңбекақы қорына қатысты проценттерде белгіленіп, заңды және жеке тұлғалардың жылдық жиынтық табысынан шегерілетін шығындарға жатқызылады.

Қазақстан Республикасының Үкіметі міндетті медициналық сақтандыру жөніндегі төлемдердің мөлшерін, оларды төлеудің тәртібі мен мерзімін, сондай-ақ міндетті медициналық сақтандыру жөніндегі төлемдерден Қорды ұстауға және дамытуға жұмсалатын аударымдардың мөлшерін белгілейді.

14-бап. Медициналық қызметтерге арналған тарифтер

Міндетті медициналық сақтандыру жөніндегі медициналық қызметтерге арналған тарифтер медицина ұйымының немесе жеке медициналық практикамен айналысушы адамның сақтандырушыларға медициналық қызметтер көрсету жөніндегі шығындарының құндық көрінісі болып табылады, олар Қор мен медицина ұйымының немесе жеке медициналық практикамен айналысушы адамның арасындағы келісім бойынша белгіленіп, оларды облыстардың және Алматы қаласының әкімдері бекітеді.

Медициналық қызметтерге арналған тарифтер жылына көп дегенде 2 рет қаралуы мүмкін.

Сақтандырылушы Қормен медициналық қызмет көрсету шартын жасамаған медицина ұйымының немесе жеке медициналық практикамен айналысушы адамның медициналық қызметін пайдаланған жағдайда, сақтандырылушы шығындарын Қор арқылы, бірақ осы қызметтерге арнап бекітілген орташа тарифтерден жоғары емес мөлшерде өтетіп алуға құқылы.

15-бап. Медициналық қызметтер көрсету туралы шарттың тоқтатылуы

Медициналық қызметтер көрсету туралы шарт, егер бұл шарттың жағдайларында көзделсе, тараптардың бірінің талап етуі бойынша, сондай-ақ тараптардың келісімі бойынша мерзімінен бұрын тоқтатылуы мүмкін.

Медициналық қызметтер көрсету туралы шартты мерзімінен бұрын тоқтату ниеті туралы, егер шартта өзгедей көзделмесе, тараптар бір-біріне шартты тоқтатудың ойластырылған датасынан кемінде 30 күн бұрын мәлімдеуге міндетті.

16-бап. Міндетті медициналық сақтандыру кезінде шарттардан туындайтын дауларды қарау

Міндетті медициналық сақтандыру кезінде шарттар жөніндегі

және солардан туындайтын дауларды белгіленген тәртіпке сәйкес сот қарайды.

III Тарау. Міндетті медициналық сақтандыру

қоры мен оның қаражаты

17-бап. Қордың құрылымы

Міндетті медициналық сақтандыру қорын Қазақстан Республикасының

Үкіметі құрады және ол оған есеп беріп отырады.

Қор міндетті медициналық сақтандыру жүйесінде шарттар жасау мен оның орындалуы жөніндегі қызметті тікелей жүзеге асыратын облыстық және Алматы қалалық бөлімшелерін құрады.

Қордың бюджеті республикалық бюджетті қарау кезінде жыл сайын Қазақстан Республикасының Үкіметінің қарауы мен бекітуіне жатады.

Қордың өзін ұстауға арналған қаражатының нысаналы пайдаланылуына бақылау жасауды Қазақстан Республикасының Мемлекеттік қаржы бақылау комитеті жүзеге асырады.

Қордың міндетті медициналық сақтандыру жөніндегі шығындардың орнын толтыруға арналған қаражатының нысаналы пайдаланылуына бақылау жасауды Қазақстан Республикасының Денсаулық сақтау министрлігі мен Мемлекеттік қаржы бақылау комитеті жүзеге асырады.

18-бап. Қордың қаражаты

Міндетті медициналық сақтандыру бойынша сақтандыру төлемдері ретінде төленетін және пайдаланылуы заңдарға қайшы келмейтін, басқа да көздерден түскен қаражат Қордың қаражатын құрайды.

Қордың қаражаты міндетті медициналық сақтандыру бойынша медициналық қызмет көрсетуге арналған шығындардың орнын толтыруға жұмсалатын сақтандыру резерві қорына және өзін дамыту қорына бөлінеді.

Міндетті медициналық сақтандыру қорының қаражаты бюджет құрамына кірмейді, ол сақтандырушыларға медициналық қызмет көрсету жөніндегі шығындардың орнын толтыруға арналған.

Қордың қаражаты бюджетке және өзге де мемлекеттік ақша

қорларына алынбауға тиіс, Қазақстан Республикасының заң актілерінде көзделген жағдайларды қоспағанда.

ЕСКЕРТУ. 18-бап толықтырылды - Қазақстан Республикасының 1997.06.19.

N 134-І Заңымен.

Z970134_

19-бап. Сақтандыру резервтерінің қаражатын орналастыру

Қор сақтандыру резервтері қаражатының кемінде 80 процентін міндетті медициналық сақтандыру бойынша ағымдағы төлемдерді жүзеге асыру үшін банктегі есептік шотында орналастыруға міндетті. Сақтандыру резервтері қаражатының қалған бөлігі:

а) мемлекеттік бағалы қағаздар сатып алу;

б) Мемлекеттік банктерде депозит шоттарында сақтау жолымен орналастырылуы мүмкін.

IV Тарау. Қорытынды ережелер

20-бап. Міндетті медициналық сақтандыру туралы

заңдарды бұзғаны үшін жауаптылық

Міндетті медициналық сақтандыру туралы заңдарды бұзғаны үшін жауаптылық Қазақстан Республикасының заңдарына сәйкес туындайды.

21-бап. Осы Жарлықтың күшіне ену тәртібі

Осы Жарлық 1996 жылдың 1 қаңтарынан бастап күшіне енеді.

Қазақстан Республикасының

Президенті